

Lès numèròs d' tèlèfone.

Cachî après on numèrò d' tèlèfone, vos-ôtes ... C'èst malauji, savoz ça. Por on djon.ne, au djoû d'audjoûrdu? C'èst malauji au d'la. C'èst mi qu' vos l' dit.

"Purdoz l' botin".

Lès-èlèves riwaîtenut leû profèsseûr avou dès-ouys come dès sârlètes. Di d' qwè ç' qu'èle cause, don, ç' djin là? Il ont tortos on tèlèfone di potche. Il èvôyenut tofêr dès mèssadjes à leûs soçons èt taper au pus rade one drigléye di novias numèròs dins l'indjole. Èt, s'i n' conèchenut nin on numèrò, rademint l'aler qwé su Internet. Adon ...

Nè l'zî aloz nin causer dès "personnes physiques" oubin dès "personnes morales", dès blankès pâdjes èt dès djanès pâdjes, pace qui ça ... , c'èst cor ôte tchôse, savoz. C'èst brâmint pîre. I vos r'waîtront avou dès-ouys di caracole è coûches.

"Dins lès blankès pâdjes, cachôz après l' numèrò da Mossieû Somme à Djiblou".

"Ô, mi, fé on p'tit some, ça, ça m'îreut. C'èst tot jusse ci qu' dj'aveu l'idéye do fé, tin. Èt twè, Bastyin?"

"Bin, mi, dj'in.mereu cor ostant fé l' tchèt; ci n' sèreut todi qui l' trwèzyin.me côp cite anéye ci. C'èst waîre, don!"

Nosse Fanîye, lèye, èlle èst tot l' min.me à cachî après l' numèrò ...

"Dji nè l' trove nin, nosse Dame. I n'î èst nin!"

"Comint ça, i n'î èst nin? Vèyoze one miète pus lon qu' vosse nez, Mamesèle! Comint fioz?"

"Bin, dji cache après véci".

Èle vos mèt on dwègt tot craus su l' pôve pâdje qui n' sèrè pus jamaîs blanke, èt bin sûr, cachî après su Nameur à l' place di cachî après su Djiblou.

Rimète li bauchèle su l' bone vôle èt tot l' min.me ètinde li bone réponse.

Vos n'èstoz portant nin co au d'bout d' vos rôyes, savoz, nosse Dame.

Dèdja onze eûres! Abîye! Ataquans lès djanès pâdjes.

"Po-z-awè one miète di compagnîye, vos-avoz l'idéye d'acheter on p'tit caniche. Èvou l'aloz aler qwé?"

"Mi, c'è-st-on tchin dogue qu'i m' faureut. On caniche c'èst jusse bon po lès mèmères".

"Èt mi, on Rottweiler..., èt mi ..., èt mi ..."

"I èst bon, asteûre! Aloze qwé l' tchin qu' vos v'loze. Maîs, mi, ci qu'i m' faut sawè, c'èst comint ç' qui v's-aloz fé po trover on numèrò èt one adrèsse".

"Milîye, comint frîz, vos?"

"I m' faut r'waîfî dins l' lisse qu'èst pad'vant, à "Bièsses".

"Après qwè cachoz, Milîye? Après on tch'vau?"

"Non.na don, nosse Dame, après on tchin".

"Èt bin, d'abôrd?"

Lès-ôtes ni sont pus avou nos-ôtes. Gn-a l' grand Djan qui tête li bètchète di s' crèyon, tot sondjant à s' mayon; li p'tit Nès', qui n'a d'dja jamais choûté, qui choûte co mwins' èt l' Sofîye qui mougne come s'èlle aureut l' solitaire.

"Avoz trové, Milîye?"

"Oyi, nosse Dame. Au numèro 7690".

"Milîye, c'èst l' drèssî oubin l'acheter l' tchin, qui vos v'loz fé?"

"L'acheter".

"Vos n'è l' saurîz drèssî d'vant d' l'awè, don!"

"Â,... dji deu r'waîfî à "Martchands d' tchins", d'abôrd".

"Tot jusse".

"C'è-st-au numèrô 6965. Djè l'a. A Tongrène, tchaussîye di Djiblou".

"Milîye, cètîla, i n' faîyenut qu' dins lès tchins d' vatches!"

"Â, oyi. Ratindoz ... "Canichou", dins lès Fonds à Naulène, 071 21 38 16".

"Èt bin, vola, c'è-st-au trwèzyin.me côp qu'on vwèt lès maïsses!"

À l'uch, li solia s' vint fé one pitite place ètur deûs vias-d' mârs'. Lès tièsses si toûnenut.

"Èt vos, Pôl, on n' vos-ètind nin. Dijoz m' one miète li numèrô qu' vos frîz si vosse mononke tchaîreut flauwe su l' pavéye èt l' divu mwinrner rademint à l'ospitau?"

"Bin, qu'èst ç' qui dj' sé, on, mi".

"Mi, dji sé bin, nosse Dame", di-st-i, li p'tite ârsouye di Piêre, "si mononke sèreut mwârt divant qu' l' eûche trové l' numèrô".

A.-M. FRANCOIS